



Broj/Број: 04/2-50-1-16-11/05
Sarajevo/Сарајево: 25.1.2006.

ZAPISNIK
SA 11. SJEDNICE ZAJEDNIČKE KOMISIJE ZA EVROPSKE INTEGRACIJE

Sjednica je održana 23.1.2006 . sa početkom u 10:30. časova.

Sjednici su prisustvovali: Fatima Leho, predsjedavajuća, Vinko Radovanović, drugi zamjenik, Nenad Mišić, član, Boško Šiljegović, član, Branko Zrno, član, Selim Bešlić, član Osman Topčagić, direktor Direkcije za evropske integracije, Igor Davidović, glavni pregovarač BiH sa EU, Dragan Mrkalj, stručni savjetnik u Direkciji za evropske integracije i Jelena Rajaković, privremeni sekretar Komisije. Sjednici je prisustvovao i g. Mirsad Ćeman, predsjedavajući Ustavno-pravne komisije Predstavničkog doma PS BiH.

Odsutni su bili: Filip Andrić, Mehmed Suljkanović, Hilmo Neimarlija, Milorad Živković, Halid Genjac i Ilija Filipović.

DNEVNI RED

1. Nacrt osnova za vođenje pregovora za sklapanje Sporazuma o stabilizaciji i pridruživanju između Evropskih zajednica i njihovih država članica i Bosne i Hercegovine.

Izjestio:

- g. Igor Davidović, glavni pregovarač BiH sa EU
- g. Osman Topčagić, direktor Direkcije za evropske integracije

Ad.1. 1. Nacrt osnova za vođenje pregovora za sklapanje Sporazuma o stabilizaciji i pridruživanju između Evropskih zajednica i njihovih država članica i Bosne i Hercegovine.

Prije početka pregovora o Sporazumu o stabilizaciji i pridruživanju, čija se prva runda održava 25.1.2006., g. Igor Davidović, glavni pregovarač BiH sa EU i g. Osman Topčagić, direktor Direkcije za evropske integracije, obavjestili su članove Zajedničke komisije za evropske integracije Parlamentarne Skupštine Bosne i Hercegovine o Nacrtu osnova za vođenje pregovora za sklapanje sporazuma o stabilizaciji i pridruživanju između evropskih zajednica i njihovih članica, i BiH.

G.Igor Davidović je istako značaj koji PS BiH ima u ovom procesu, budući da će preuzete obaveze morati da budu ratifikovane od strane ove Skupštine.

G. Davidović je obavjestio prisutne o formiranju 8 pregovaračkih timova, za šta je presudna bila kvalifikovanost, poznavanje materije i znanje engleskog jezika.

Istakao je da je prije početka pregovora najbitnije definisati šta je ono što se štiti tokom pregovora, a šta ono što se promoviše, dodavši da se nada da BiH političke strukture mogu same iznijeti ovaj proces, jer je ovo šansa koja je data BiH da pokaže svoju političku zrelost.

Treba imati u vidu da postoji određen skepticizam druge pregovaračke strane po pitanju samostalnog političkog djelovanja Bosne i Hercegovine, a jedini način koji može da ih razuvjeri jeste dosljedna implementacija onoga što je tokom pregovora prihvaćeno.

Govoreći o prvoj rundi pregovora (25.1.2006.) g.Davidović je rekao da će se tada označiti pozicija BiH i razgovarati o preambuli Sporazuma o stabilizaciji i pridruživanju.

Tokom sledeće runde, 17.marta 2006. planirani su pregovori o suštinskim odredbama Sporazuma. Planirana dinamika pregovora je jedna runda svakih šest sedmica.

G.Davidović je izrazio očekivanje da će pregovori biti završeni za godinu dana i dodao da je velika olakšica BiH što već ima ugrađene evropske standarde u većini svojih zakona.

Govoreći o tranzicionom periodu, odnosno roku u kome traba da se izvrše sve preuzete obaveze ,g. Davidović je rekao da će BiH tražiti da se taj rok skрати na 8 godina, umjesto 10 na čemu insistira Evropska Komisija.

G. Osman Topčagić je obavijestio prisutne o formiranju Državne delegacije za pregovore, koja treba da stvori uslove za pregovore, i Pregovaračkog tima, koji ima usvojenu platformu i mandat da pregovara.

Naglasio je da svaki zastoj u reformama u zemlji znači i zastoj pregovora, zato je neophodno obezbijediti uslove da se pregovori odvijaju nesmetano.

G. Topčagić je govorio i o susretima sa predstavnicima Evropske komisije kao i o sastancima sa kolegama iz zemalja u regionu. On je istakao da države članice EU nisu imale prigovor na tekst Sporazuma ali su imale prigovore na mogućnost BiH da ga primjeni.

Predsjedavajuća Zajedničke komisije za evropske integracije PS BiH, gđa.Fatoma Leho je predložila da nakon svake runde pregovora (svakih 6 nedelja) Komisija bude obavještена o toku pregovora.

G. Davidović je rekao da se slaže, te da ti sastanci treba da budu konsultativni.

On je naglasio da Parlament može dati veliki doprinos ovom procesu i zbog veza koje parlamentarci imaju sa kolegama iz parlamenata zemalja članica EU.

U tom smislu će biti izuzetno značajna međuparlamentarna saradnja jer će sporazum morati da ratifikuju parlamenti zemalja članica EU.

G. Vinko Radovanović je predložio da osim izvještavanja nakon svake runde pregovora Zajedničke komisije za evropske integracije, članovi Komisije budu u poziciji da daju i određene sugestije za narednu rundu pregovora.

G. Nenad Mišić je istakao da je Parlament sada u poziciji da igra svoju pravu ulogu, jer su do sada zakoni većinom nametani. Sada PS BiH može da dokaže da je u stanju da samostalno i profesionalno obavlja svoj posao , naročito jer EZ posmatra da li smo zreli za to.

G. Boško Šiljegović je naglasio da se ova Komisija treba iskoristiti za promovisanje u Domovima PS BiH onoga što je neophodno za pregovore kako bi se to lakše i brže usvojilo , te da je saradnja Pregovaračkog tima i Direkcije za evropske integracije sa Zajedničkom komisijom za evropske integracije PSBiH najznačajnija u tom smislu.

Na kraju ove tačke dnevnog reda donesen je zaključak da se nakon svake runde pregovora održi Sjednica Komisije na koju će biti pozvani g. Igor Davidović i g. Osman Topčagić.

Ad.2. Donesena je odluka da će na sastanku COSAP-a koji će se održati u Zagrebu od 5. do 6. marta 2006. učestvovati: Vinko Radovanović, Branko Zrno, Nenad Mišić, Mehmed Suljkanović, Halid Genjac, Ilija Filipović i Jelena Rajaković.

Jelena Rajaković

Privremeni sekretar
Zajedničke komisije za
evropske integracije PS BiH

Fatima Leho

Predsjedavajuća
Zajedničke komisije za
evropske integracije PSBiH